

欽
定
全
唐
文

欽定全唐文卷五十八目錄

憲宗 三

討王承宗制

授李逢吉門下侍郎平章事制

放免京畿積欠制

韋貫之守尚書吏部侍郎制

授王涯中書侍郎平章事制

貶韋楚材澧州司法參軍制

授崔羣中書侍郎平章事制

賑諸道遭水人戶制

授李逢吉劔南節度使制

授李愬山南東道節度使制

李光顏檢校司空封郡公制

李鄴守戶部尚書制

授李夷簡門下侍郎平章事制

授李夷簡淮南節度使制

授王涯兵部侍郎制

授皇甫鏘戶部侍郎同平章事制

授程昇工部侍郎同平章事制

放歸蕃使論矩立藏等制

授劉悟義成軍節度使制

授裴度河東節度使制

授皇甫鏘門下侍郎平章事仍兼判度支制

勅皇甫鏘勿兼判度支制

欽定全唐文卷五十八

憲宗 三

討王承宗制

上帝垂象輝弧矢之芒先王取威陳鈇鉞之柄蓋所以昭
宣七德保乂兆人故窮陰有助於歲功而大刑無廢於國
典朕承累聖之休祉奉昊穹之眷命道思格物心豈佳兵
期致俗於和同庶納人於軌度緬窺鍾鼎無忘衛國之勞
永惟帶礪每存延代之賞故太尉武俊頃因多難首建大
勲懸捧日之明誠遏滔天之逆豎武烈有過於雷震壯容

具紀於丹青餘風凜然雖死不朽是宜子孫襲寵邦國同
休而王承宗墜乃箕裘隳其門戶不思祖宗之德忍與梟
獍同謀不顧天地之恩敢以豺狼爲性飽則逾悖撫之不
馴兇狂屢見於表章戕賊竊加於宰輔四方同駭千古所
無朕以思人愛樹投鼠忌器優柔而未斷隱忍而不征屈
其憲法唯絕朝貢俾之思過將謂革心而乃先動干戈屢
犯城邑焚燒剽掠流毒於人罪惡既不可容誅討蓋非獲
已況四面征鎮憤激咸同中朝卿士奏議相繼雖覆以大
道欲更含宏而迫於羣情須正刑典宜令河東幽州盧龍

義武橫海魏博昭義等節度兵馬計會進討其承宗在身
官爵並從削奪言念廼祖嘗著功庸蠹茲狡童自取廢絕
其所襲實封宜迴賜武俊子右金吾衛將軍士平俾之纂
承無乏祭祀若承宗翻然改悟束身入朝必議加恩不唯
貸法如沈迷自若討伐遂行則罪止一身其餘驅脅之徒
一切不問大軍旣臨計即戡殄其成德將士等或染汚俗
或迫兇威雖效忠誠無階自達但能去逆效順因事立功
隨其高下厚其寵錫如有梟斬渠魁及執送京兆以效誠
節者王承宗在身官爵土地等便以迴授仍與實封五百

戶莊宅各一區錢二萬貫如有能率所管兵馬及以城鎮
來降者並超三資與官仍與實封二百戶錢一萬貫其以
州降者便與刺史仍賜實封三百戶如本是刺史更超三
資與官賜實封三百戶以縣降者超兩資與官賜實封一
百戶其以一營一柵降者節級褒陞務從優厚其諸軍行
營將士有先登陷陣屠城下邑者亦準此處分其接近賊
界諸道應副行營將士如有能梟斬承宗者亦準前例處
分其接近賊界州縣自軍興以來供饋繁併嗟我疲瘵良
增憫然應元和十年兩稅斛錢物在百姓腹內并十一

年夏稅並宜放免其有城鎮將士百姓守節拒賊身死王
事者各委長吏優給其家仍具事跡聞奏當加褒贈其有
潛謀誅斬承宗被其屠戮者優加追贈并賜錢帛仍與一
子官六州百姓莫匪吾人墜於塗炭深用嗟惻兵之所至
不得妄加殺戮及焚燒廬舍掠奪資產并有拘執以爲俘
馘事平之後給復三年其六州管內百姓能相率來歸者
所在安存各加優獎方當春候務切農桑邊界之人慮妨
耕織應緣軍務所須並不得干擾百姓如要車牛夫役工
匠之類宜和雇優給價錢賊平之後應立功將士並與超

資改轉節級賜物續有處分於戲朕正位凝命竭誠嚮方
勞謙在心慈儉爲寶而化未陶於頑傲澤未浸於隱微薦
興甲兵布在原野中宵愧歎當宁憂兢庶將除姦非曰尚
武宣示中外宜體至懷

授李逢吉門下侍郎平章事制

門下朕觀古先哲王興化致理未嘗不選建良弼熙寧庶
工俾之敷陳大猷左右乃辟者也朝議郎守中書舍人權
知禮部貢舉輕車都尉賜緋魚袋李逢吉疏通而守於經
制質厚而輔以文章貞恒自居和易待物體賢人之志業

茂端士之風規歷履班行發揮事任厥心匪懈所至有聲
自彌綸粉闥駁正瑣闥且司言於右掖嘗納訓於東儲誠
明一貫聞望旁洽俾司貢士彌著嘉聞方今外興不得已
之師內有不獲安之俗恒忘食於將肝務求衣於未明冀
清原野之誅用止干戈之役登爾匡輔代予憂勤爾宜宣
至化於吾人告嘉猷於厥后銷弭氛祲導迎和平事有不
舉其中正或未孚於下爾惟啟沃無乃面從可朝議大夫
守門下侍郎平章事賜紫金魚袋

放免京畿積欠制

疆理宇內必先於京師惠綏四方亦始於中國蓋以千里之壤百役是資俾其不足吾孰與足頃自春及夏時澤未降恐失順成之道或生歉儉之災是以仰瞻昭回俯察田畝喜獲朝隲之潤方寬夕惕之憂思遂康寧盡蠲逋負其京畿百姓所有積欠元和九年十年兩稅及青苗並折糴折納斛斗及稅草等除在官典所由腹內者並宜放免

韋貫之守尚書吏部侍郎制

朕恭己臨人勵精思理二三執政繇吾股肱念始終之罔虧於進退而尤重苟或將明失中輔導不專依違於懷尚

慎斯舉君臣之義豈不宏乎中大夫守中書侍郎同中書
門下平章事上騎都尉賜紫金魚袋韋貫之早著淑聲累
更顯貫潤以文藻懿其風猷爰膺選衆之求式佇弼予之
美而自當鈞軸屢變星霜虛襟以聽未聞至論非啟沃之
道有所不行何燮諧之功蔑爾無效欲抑浮華之路在捐
朋友之私人亦具瞻事將奚副用解樞機之務俾居衡鏡
之職克允斯任宜和厥心可守尚書吏部侍郎散官勲賜
如故

授王涯中書侍郎平章事制

門下上宰參職所以法三台之耀中樞議政在乎遂萬邦
之宜朕獲承鴻休思建皇極冀沃心而納誨恒注意以求
賢通議大夫尚書工部侍郎知制誥翰林學士上柱國清
源縣開國男食邑三百戶賜紫金魚袋王涯動直靜專踐
方居易挺歲寒之勁質抱夙夜之端誠言唯守中慮每經
遠屬者禁垣揮翰五字日宣選部持衡九流風動荐居肘
腋之地厯試股肱之才進嘗伏於青蒲出不洩其溫樹牟
融得大臣之節毛玠有古人之風詢廟算於生知論兵鈴
而暗合方今戎車尚駕郊壘猶多必俟清明以消氛沴是

用付以機密陟於崇高爾惟發號令以端其四方陳便宜以寬於百姓行臺閣之故事宏朝廷之大體秉德以立徇公不回俾予一人垂拱而理敬聽朕命懋哉懋哉可守中書侍郎平章事

貶韋楚材澧州司法參軍制

頃因按事兼舉憲章閱實繩違有乖詳審既薄其責仍掾大藩載令研究其端頗見異同之狀況誠途祇命淹駐近郊苟於造次之間靡懷敬慎之義既茲速戾豈謂周防更移遠藩俾自懲省

授崔羣中書侍郎平章事制

門下成萬方之化通天下之志緝熙帝載昭暢元猷在於
股肱之臣共凝理本旁求時彥以敘彝倫朝散大夫守尚
書戶部侍郎上護軍賜紫金魚袋崔羣粹密由道端莊保
和本清明之上才體博厚之重德學貫通儒之業詞含大
雅之風居敬有恒循性能斷自承我密命職參內庭高文
煥發於綸言敏識詳達於國典伏奏無撓直躬不回勤勞
八年始終一致春闈取士必後其浮華地官理財能制其
輕重儉以約己忠惟事君才適而用深望積而實著風猷

已洽於人聽倚屬方注於朕心乃膺審象之誠以副具瞻之望況奸兇叛逆尚駕戎車未明求衣思戢干櫓爾宜酌古今之要舉刑政之中艱厥位以代天工陳具謨以明皇極敬茲重命往踐台階可守中書侍郎同中書門下平章事散官勲賜如故

賑諸道遭水人戶制

朕爲人君期致豐寧夙夜永思未嘗怠息而庶政猶闕恒雨爲災至今遠近或有墊溺浸敗廬舍漂浸田苗言念疲黎重罹斯弊覽茲奏報嗟悼良深將俾獲安豈忘賑救其

諸道應遭水州府河南澤潞河東幽州江陵府等管内及
鄭滑滄景易定陳許晉隰蘇襄復台越唐隨鄧等州人戶
宜令本州厚加優恤仍各以當處義倉斛斗據所損多少
量事賑給訖具數奏聞

授李逢吉劔南節度使制

蜀門南次梁部東分地東江山境緜實濶非志懷端重不
可委以察廉非識度宏深不可付以節制聿求公望爰自
輔臣朝議大夫守門下侍郎同中書門下平章事輕車都
尉賜紫金魚袋李逢吉文以發華行惟居厚忠懇每形於

造膝直方斯見於匪躬自處台席載移星琯溫然德器休
有素風觀其動本於仁足以敷王澤考其守歸於正足以
奉師貞乃眷梓潼茲惟奧壤用去將明之任俾效藩宣之
功予欲頒正典於一隅故兼以夏卿之位予欲布憲章於
列郡故假以副相之權爾其儉節以訓俗澄清以檢吏因
土風之剛悍使勇且知方就物產之殷充俾旣富而教苟
能積實期有遐聞於戲朕於大臣進退示全其恩禮爾之
報國始終宜竭其肺肝身雖遠出於山川心豈或忘於夙
夜服茲休命俞往欽哉可檢校兵部尚書使持節梓州諸

軍事兼梓州刺史御史大夫充劍南東川節度副大使知節度事管内支度營田觀察處置靜戎軍等使散官勲如故

授李愬山南東道節度使制

門下伐叛除兇必俟乎奇略進封超位允荅於殊庸況四紀逋誅三州竊據積妖遺育縱亂挺災累年徂征一舉生致論功既當於異等議賞豈待於踰時唐隨鄧等州節度觀察處置等使通議大夫檢校左散騎常侍使持節鄧州諸軍事兼鄧州刺史御史大夫賜紫金魚袋李愬宗臣之

允王國克生毅勇蓄深溫良煦外禮樂戰攻之器默識其
源詩書義理之府洞窺其室雖早升朝序而未展將材頃
以懸弧滔天宿兵旣久方城壓境易帥頗頻永懷韜略之
家必有弓裘之嗣將執金鼓載持干旄果副眷求克揚威
令緝傷夷之後振怯爲雄制密邇之間保危成固推忠厚
以感物本信惠而和人一其關心勵厥死力乘虛徑襲負
雪兼行風驅如合於百神雷發若出於九地堅城立潰狡
豎坐擒遺賍安堵以知歸餘黨釋甲而請命古之良將其
孰過焉已申獻捷之儀當舉策勲之典爰授名部俾恢重

藩自洛而遙惟襄爲大綿亘楚服橫臨漢津總八郡以澄
清秉三軍之節制式因加地往繼沈碑特遷左揆之尊崇
茲天秩仍假南臺之長峻彼霜威表以勲階賜之茅社戶
豐真食門貴延恩洽此寵榮叢於茂烈於戲天鑒非遠不
庭者必誅王爵無私有功者是享揚名濟美惟孝著於家
聲鍾鼎山河惟忠光於國籍凡曰臣子得無企歟可銀青
光祿大夫檢校尚書左僕射使持節襄州諸軍事兼襄州
刺史御史大夫充山南東道節度管内支度營田襄鄧唐
隨復郢均房等州觀察處置等使仍賜上柱國封涼國公

食邑三千戶并賜食實封五百戶與一子五品正員官主
者施行

李光顏檢校司空封郡公制

門下授鉞鉞之寄當兵車之會力鋤兇險志殄寇讎星霜
固難奪之誠始終見師貞之節嘉猷益茂力集休勲宜崇
寵光肆於時夏考諸前志斯爲大經忠武軍節度使李光
顏崆峒秀氣爲時生才謙和不流簡厚能斷本忠信以經
武閱詩書以理戎首職北垣聲雄大鹵受命旣平於朔野
懸軍亦翦其巴庸已積功勞銘在鍾釜朕以淮瀆負固厯

紀稽誅自授兵符獨運明略分營先得其地險吞敵屢挫
於賊鋒嘗下名城拔其趙幟制勝之術動合鬼神百戰表
於忘軀一心注於報國歲月滋久堅誠不回當凶妖就執
之初是潰黨乞降之際單騎以入其柵壘免胄而弔其傷
殘納之不疑乃見全德今攬槍已滅申蔡無虞寢興以思
用息戎馬則報功顯秩位宜重於三公馭貴殊勲賦亦開
於千乘陟論道之優禮獎述職之崇名爾其敬之無替舊
服可檢校司空使持節許州諸軍事兼許州刺史御史大
夫依前充忠武軍節度管内支度營田陳許等州觀察處

置等使仍賜上柱國封武威郡開國公食邑二千戶散官
勲如故主者施行

李鄴守戶部尚書制

夫爲君者求舊以申其用施恕以遂其情爲臣者陳力以
効其能奉身以明其志故在上則始終之道備居下則進
退之義全茲惟休哉用厚恩禮銀青光祿大夫守門下侍
郎同中書門下平章事上柱國江夏縣開國侯食邑一千
戶李鄴居潔履方端明審固有沈毅莊重之質有堅剛迅
敏之心勁節夙表於屯夷利器久彰於中外朕所以跡其

衆善詢及庶工登之台階授以政柄將欲藉其碩望宏厥壯猷而固辭之誠再䟽頗切然猶未允其請所冀或副予懷迨此旬時勞於夙夜益願頤養堅稱衰遲宜罷樞軸之殷俾居喉舌之重就閒高秩式示優崇可守戶部尚書

授李夷簡門下侍郎平章事制

門下致理之道王者由其盡心弼成之功輔臣所以宣力皇極是建蒼生乃安敷求實難倚任斯重將付大政必惟僉諧正議大夫守御史大夫上柱國成紀縣開國侯食邑一千戶賜紫金魚袋李夷簡才稱通明性本嚴重守以正

直傳之文華羽儀朝端冠耀宗籍早司邦憲爰總地征糾
逖無聞於避強經費克均其定制中立不撓孤標出倫聳
善激貪法行令肅自鎮漢上洎臨蜀川儉德載彰清規一
貫山岳比厚雷風有恒勵貞峻以理心竭忠勞而奉上人
望汲黯印歸趙堯俾之持綱萬目皆舉固可以綜參庶務
允釐百工變和陰陽宣發號令是用申命陟於台階於戲
說積爾躬夢協朕志虛己將求其宏濟鯁言罔懼於怫違
道必舉中位無苟曠膺此寵擢敬哉戒哉可守門下侍郎
同中書門下平章事

授李夷簡淮南節度使制

柱石之臣台庭之老積其具瞻之德載有弼諧之功授以
土田流邦家之愷悌增其冕服表國器之形容此朕與將
佐大寮示中外之一體也況兵戎重事東南實繁輟於廟
堂以示其大正議大夫守門下侍郎同中書門下平章事
上柱國成紀縣開國侯食邑一千戶賜紫金魚袋李夷簡
監以蒞政事而守道素風彰於操履浩氣峻於風雷自朕
續承丕圖搜拔下位得文華於宗室外器幹於朝廷而所
重者準繩所憂者財賦資侔儻以振起委疆通而演成江

漢之仁風載揚岷峨之美化斯盛既執大憲俄登公台輔
予一人凝是庶績忠謹有遭逢之勇奸邪無侵敗之機謂
之股肱實爲無愧言念淮海斯爲奧壤走商賈之化財引
舟車之漕輓凡所經理事非一隅控制之難於今尤切是
用錫命俾爲藩宣式加師長之名不改平章之務萬邦表
率丞相關之可銀青光祿大夫檢校尚書右僕射同中書
門下平章事兼揚州大都督府長史充淮南節度副大使
知節度使事管內營田觀察處置押新羅渤海兩番等使

授王涯兵部侍郎制

股肱之任與國同體苟或取容於位啟沃無聞將何以寅
亮天工宏宣景化朕嗣膺丕業爰任鈞衡知善必升見否
而退茲所以推至公於天下也銀青光祿大夫守中書侍
郎同中書門下平章事上柱國清源縣開國男王涯素以
藝文早登華貫參我宥密再處內庭位踐公台拔於非次
誠宜匪躬峻節納誨盡忠而乃因循自持謙默無補期於
進道屢復星霜空勞虛懷未副明獎雖夙夜之勤久著而
具瞻之望何從君臣之間義存終始宜解職於樞務俾貳
曹於夏官尚謂優崇勉敬斯任可行尚書兵部侍郎

授皇甫鏞戶部侍郎同平章事制

六符成象所以平太階九賦克均所以阜羣物爰資宰執
宏贊謨猷達其富庶之源以致雍熙之化用輔台德其允
具瞻朝請大夫守尚書戶部侍郎兼御史大夫判度支上
護軍賜紫金魚袋皇甫鏞行惟孤貞性本堅直秉仁履義
守正持方才適變通辭去枝葉蘊沖用於靈府表公器於
士林夙懷經濟之謀早在賢良之選累踐華貫服於大僚
端肅有常發揮事任自總邦計貳領地官屬以徵戎車討
平淮寇發輶調食制外自中法無過差動有成績山甫彰

勤恪之效志在奉公夷吾識輕重之權誠宜佐國是用命爾俾升台司望以拔心勞乎注意尚興師旅方殄妖氛翼亮是參經費仍屬爾其悉乃心力副予簡求物有未遂其宜望有未洽於道罔或安位必思匪躬酌下土之盛虛闕中樞之政令光昭厥辟時乃之休可守尚書戶部侍郎同中書門下平章事依前判度支

授程昇工部侍郎同平章事制

門下昔漢宣帝宏祖宗之業正刑德之本簡求輔相以致中興朕祇荷丕圖思揚聖緒每懷舟楫以涉大川俾人不

迷用底於道今獲良弼式允僉諧朝散大夫守衛尉卿御史大夫充諸道鹽鐵轉運等使賜紫金魚袋程异厚德外嚴沈機內朗抱精微以致遠本誠明以格物盡瘁事國誠正在公常探化原雅尚學術揚厯斯久公望藹然自位列大僚總諸劇務達榷酤之利適財賦之方贍出納於邦家申績效於官業頃以淮夷未殄師旅在郊有漕輓之勞兼供億之費言念多事恐傷吾人而异法能變通道益明著言無伐善動必由衷蘊夷難致君之心見懷道佐時之略況屬饋軍之事尚倚良能載閱前功宜當大用乃服休命

俾參中樞爰表秩於冬官仍兼綜於舊職膺茲重任用表
全材爾宜左右朕躬朝夕啟沃干戈未戢尤佇廟謀敬聽
斯言副我明獎可守尚書工部侍郎同中書門下平章事
依前充諸道鹽鐵轉運使

放歸蕃使論矩立藏等制

朕臨御萬邦推布誠信西戎納款積有歲時中或虧違亦
嘗包貸我有殊德寧不是思重譯貢珍道途相繼申恩示
禮曾無闕焉昨者蕃使奏章又至京輦將君長之命陳和
好之誠臨軒召見館餼加厚復以信幣諭之簡書亦旣言

旋纔及郊甸遽聞蟻聚來犯封陞河曲之間頗爲暴擾背
惠棄約斯謂無誠公議物情咸請誅絕朕深爲德化之未
被豈慮夷俗之不賓其國失信其使何罪釋其維繫以遂
性示之宏覆以忘懷予衷苟孚庶使知感其蕃使論矩立
藏等并後般來使並宜放歸本國仍委鳳翔節度使以此
意曉諭

授劉悟義成軍節度使制

門下王者驅大順以道至和不能無狡寇天將廓沴氣以
息暴亂則必有忠臣非處迷何以明其勁節非嘉獎何以

表其尤功況討罰之初詔命斯著高懸寵爵獲則當之淄
青都知兵馬使金紫光祿大夫試殿中監察御史上柱國
劉悟忠孝之後義勇爲心久淪跡而未申每蓄謀以思奮
屬姦兇負阻將帥徂征宣威已震於河山肆逆猶固其巢
窟遂能潛通密款先事指期決策於萬衆之中挺身於重
城之內感深而信誓若一氣直而神明爲徒梟彼渠魁殲
厥醜類乃飛章以馳獻繫大慶之遐聞臨軒載懷是舉斯
命眷彼雄鎮惟茲滑臺有二郡察俗之殷其人勁而剛有
三軍制節之重其士毅以肅俾膺分閫式委觀風超昇題

劔之名所以崇其望兼假弄印之任所以峻其威䟽封廣載其土田眞食爰優其戶賦仍加厚賜用示深恩高門大啟於通衢別墅榮分於沃野凡是賞典稱乎國章於戲在昔天寶季年羯胡首難惟悟之祖職居平虜能戮賊臣竟通朝命賜名以旌其忠授鉞以仗其材今悟又能除妖可謂濟美勉持忠孝以保家邦可檢校工部尚書使持節滑州諸軍事充義成軍節度使勲封如故

授裴度河東節度使制

忠利於國者效積而事彰器周於物者志遠而任重況入

調鼎鼎出鎮藩垣荷中外之寵榮膺文武之重寄將允僉
望命茲輔臣金紫光祿大夫門下侍郎同中書門下平章
事兼宏文館大學士上柱國晉國公食邑三千戶裴度量
惟宏深道在匡濟大玉蘊連城之價長材負構厦之姿言
必公忠義本誠罄自居鈞軸叶贊機謀匪躬以務其將明
憂國不忘於造次當夷兇淮蔡仗節於師旅之間及殄寇
青齊運籌於帷幄之內勤勞靡替宏益居多績用是嘉撫
冲逾懇東夏雄屏實惟晉陽控大鹵之山川司北門之管
籥橫制獫虜遠清疆陲是以輟獻納於沃心撫方隅於注

意倚屬攸切勲庸可宣舟楫常賴其弼予鈇鉞載觀其莅
衆勵山甫之恪德成方叔之壯猷式副具瞻勉揚休問務
旣兼於左揆秩仍踐於中台爾其戒哉以服嘉命可檢校
尚書左僕射兼門下侍郎同中書門下平章事太原尹北
都留守充河東節度觀察處置等使

授皇甫鏞門下侍郎平章事仍兼判度支制

門下選衆舉材俾參大政俟善績丕著嘉謨有成然後進
序台階協宣德務乃制輕重謂之盈虛以經用靡虧而戎
功克集黃扉之位式示疇勞朝請大夫守尚書戶部侍郎

兼御史大夫判度支上護軍賜紫金魚袋皇甫鎛器識端
方性尚孤直文發身而詞去枝葉學爲己而政資本根每
脫落於浮榮能優游於劇任志圖經遠心惟徇公自貳中
台專總大計升之相府兼贊鴻猷屬問罪二方徵師十萬
千金難減於日費百役併萃於司存而供億罔差中外咸
若泉貨無虞於竭涸干戈遂致於清寧允茲忠勤副我倚
任是宜踐居左輔均賦中邦漸於雍熙期乃成績可守門
下侍郎平章事依前判度支

勅皇甫鎛勿兼判度支制

門下古者丞相府不接吏蓋以任重體大地親禮崇苟非
征討之時豈仗貨財之事爰俾出納歸諸有司用嚴台庭
以輔吾道中大夫守門下侍郎同中書門下平章事判度
支上柱國賜紫金魚袋皇甫鏞精明絕倫乾健不息蘊是
器業發爲英華頃以守位聚人必資大計因其能事委以
重權致用之機所以經天下之務重輕之法所以筦天下
之財自淮右不虔東平犯順兵車在野饋食連年而乃庖
無折刃御有濡轡旣授明命升之股肱軒裳所瞻崖岸益
峻請謁自絕其風凜然況瞻給之餘謀慮必至平二方之

金史卷之三
險阻慮載戢之干戈庸非坐籌佐朕而致今則百揆攸敘
萬邦保和宜全相府之重勿領計司之劇撫夷夏調陰陽
用安元元時乃之職可守門下侍郎依前同中書門下平
章事

欽定全唐文卷五十九目錄

憲宗 四

命胡証充京西京北巡邊使制

授令狐楚中書侍郎平章事制

加韓宏中書令制

加田宏正侍中制

貶崔羣潭州刺史制

貶令狐楚宣州刺史制

改封永昌公主制

禁奏祥瑞及進奇禽異獸詔

遣使宣慰江淮詔

甄錄諸道節度使團練經略防禦等將士詔

遣使宣慰申光蔡等州詔

招諭劔南諸州詔

處分及第舉人詔

平劉闢詔

誅劉闢等詔

答杜佑表請致仕詔

授蘇繫等官詔

贈袁高禮部尚書詔

討李錡詔

禁厚葬詔

禁採銀坑戶令採銅助鑄詔

欽定全唐文卷五十九

憲宗四

命胡証充京西京北巡邊使制

周禮政官之屬掌導王志以巡天下之邦國六郡統臨二
庭繇邈居必申儆動當懾懷頃自東夏有虞近郊多壘沙
朔之外翦爲寇戎亭障烽櫓之嚴遐張塞下使譯道途之
要遠屬湟中今妖氛甫清師旅方息思欲肅關隴之右地
制昆夷於盛秋而慮師無見糧卒有虛籍乏守禦之全備
積愁歎之餘音臨軒永懷宜俾宣導非夫忠良練達文武

兼資信厚足以得人心恪恭足以奉王事則何以膺茲選
任布我憂勞至於問戍役之勤詳山澤之要稽軍實之名
數計餽餉之盈虛宿弊有未除衆情有未達兵機虜態一
以上聞冀在此行所至循拊宜令左金吾衛大將軍兼御
史大夫胡証充京西京北巡邊使所經過州鎮與節度防
禦使刺史審量利害具事實聞奏

授令狐楚中書侍郎平章事制

門下贊天工而成光濟叶帝力以致昇平非中和稟氣不
能將變調之道非誠明在躬何以膺弼亮之位況今積祲

已弭而邊鄙猶虞大化方行而里閭未泰將欲舉百度甄
羣材外撫四夷內輯諸夏納之壽域被以仁風代予之勤
其孰克任眷求斯得是用命之河陽三城懷州節度使朝
議郎使持節懷州諸軍事守懷州刺史兼御史大夫賜紫
金魚袋令狐楚根於粹厚著以端明表山立之莊容洞泉
渟之精識文高雄富學茂該通自頃揮翰掖垣持囊禁署
嘗延造膝屢竭沃心發言有誠臨事無惑藹是公望居然
國楨及剖符近郊兼暢牧人之術仗節分閫尤深馭衆之
方可謂器適中外效宣文武宜展舟楫之用式登鼎鉉之

司管於中樞持我大柄於戲輔翼之任人臣極崇未至而衆議有歸旣處而其名罕副萬務攸託朕何賴焉爾其敬聽此言深思其道行致君之志始終勿渝以報國爲期夙夜益勵無俾厥后有慙知臣可朝議大夫守中書侍郎同中書門下平章事

加韓宏中書令制

納大忠樹嘉績爲臣所以明極節錫殊寵進高秩有國所以待元臣況乎邦教誕敷王言總會百辟攸憲四方式瞻永念於懷久虛其位載揚成命僉曰休哉宣武軍節度副

大使知節度事汴宋亳潁等州觀察處置等使開府儀同
三司守司徒兼侍中使持節汴州諸軍事汴州刺史上柱
國許國公食邑三千戶韓宏降神挺材積厚成器中蘊深
宏之量外標嚴重之姿有匡國濟時之心推誠不耀有夷
兇禁暴之略仗義益彰自鎮浚郊二十餘載師徒稟訓而
咸肅吏士奉法而愈明俗臻和平人用庶富威聲之重隱
若山崇屬者淮瀆濯征命統羣帥克殄殘孽惟乃有指縱
之功及齊境興妖分師進討遂梟元惡惟乃有略地之効
旣聞旋旆俄請執珪深陳魏闕之誠遠繼韓侯之志朝大

有慶湛露方濃又抗表章固辭戎旅三加敦諭所守彌堅
于蕃于宣諒切於注意我弼我輔難違其衷懇式遂良願
載兼上司論道之崇因之以齊八政中樞之長昇之以贊
萬務元袞赤舄備於寵光不有其人孰膺斯任於戲出總
兵柄入參廟謨家國之慶盈門君臣之道交泰爲我柱石
古今曷儔服而滋恭以佑乃辟可依前守司徒兼中書令
散官勲封如故主者施行

加田宏正侍中制

古之所謂有功諸侯出征不庭入覲王室旣展述職之義

必加錫命之恩彤弓所以表其威元衮所以榮其服然後
勲烈炤焯寵章榮崇臨於一方示彼四國風雅所載不其
美歟我思忠臣是有茲命魏博等州節度觀察處置等使
光祿大夫檢校司徒同中書門下平章事兼魏州大都督
府長史上柱國沂國公食邑三千戶田宏正受天地之正
性明君臣之大節才貫文武識探古今熙百志以立身堅
一心而奉主積誠自久遇事乃彰曉於羣情率以大順遂
提六郡之地首革兩河之風及負海阻兵徵師問罪又能
長驅義旅直抵虜城一鼓而兇徒褫魄再戰而元惡傳首

永清氛沴功實卓然自秉珪來朝鳴玉入侍察其器度詢以謨猷每聞匡國之術彌見致君之道而懇陳懇闕不願守藩朕以將相之權中外一體苟意有攸往則誠難遽從況彼邦之人皆願其至師徒久便其訓令黎庶咸思其惠和鎮方之安倚賴攸切是用命爾式遄其歸且兼八舍之營俾仍五教之重又實其井賦益以土田褒賞之典勸忠斯在往蒞乃服厥惟懋哉可檢校司徒兼侍中依前魏州大都督府長史充魏博等州節度觀察處置等使仍賜食實封三百戶

貶崔羣潭州刺史制

致君之道爰在輔臣發揮政經端理教化或彝倫未敘公
議不明免其所職蓋常典也正議大夫守中書侍郎同中
書門下平章事上柱國賜紫金魚袋崔羣根於溫恭發以
詞彩踐履臺閣潤色絲綸嘗以敏才列於宥密考能觀行
益表謙勤擢處鈞衡用參大政緝熙之績每竭其謀猷翊
贊之心亦彰於夙夜朕旰食思理注於話言善而可行無
不虛受而顧問之際謂近於至公詳聽之閒或違於事實
將何以同底於道化洽萬方宜罷印於中樞俾報政於外

服優以顯秩爾其勉之可使持節都督潭州諸軍事守潭州刺史兼御史大夫充湖南都團練觀察處置等使勲賜如故

貶令狐楚宣州刺史制

朕聞爲政以德必推誠而任人爲君以道必存體以立國況乎位崇元輔職總庶寮衆方具瞻時以輕重得不明進退之禮全終始之恩太中大夫守門下侍郎同中書門下平章事上輕車都尉賜紫金魚袋令狐楚夙擅懿文累階清貫先朝特加寵命獎擢內廷出擁旌旄入居鼎鉉朕祇

膺寶位注意舊臣方屬奉陵之時委以復土之務是宜竭
心徇慮使下不欺而頗聞工徒之訴累彰官吏之罪遽有
章表固求退閒宜歸相印之權往授使符之命仍兼勞於
司憲俾奉法以惠人勉率乃心思予洪覆可使持節宣州
諸軍事宣州刺史兼御史大夫宣歙池等州都團練觀察
處置使勲賜如故

改封永昌公主制

門下普寧公主天泉浴德崇蘭發彩纂組之華每工於經
目保阿之訓深得於稚年容禮必叶言行無閒從容珩璜

之韻婉婉柔嘉之儀而封䟽舊邦禮宜改避是擇美邑再
申異恩可改封永昌公主主者施行

禁奏祥瑞及進奇禽異獸詔

朕以寡昧纂承丕業永思理本所寶惟賢至如嘉禾神芝
奇禽異獸蓋王化之虛美也所以光武形於詔令春秋不
書祥瑞朕誠薄德思及前人自今已後所有祥瑞但令準
式申報有司不得上聞其奇禽異獸亦宜停進宣示天下
知朕意焉

遣使宣慰江淮詔

理天下者先修其國國命之重寄在方鎮方鎮共理實惟
列城列城爲政繫乎屬縣然則匹夫之耕匹婦之織積微
成著以供國計永念蒸庶厥惟艱哉頃年以江淮租賦爰
及榷稅委在藩服使其平均太上皇君臨之初務從省便
遂令使府歸在中朝或恐巡院旣多職因交替新制未立
舊綱已紊況河汴而東瀕海之右名都奧壤疆里接連如
或征賦不均徵輸難濟物輕貨重法弊人勞又聞江淮數
道比愆時雨深憂黎庶之不足軍國之闕供政有所不宣
事有所未便牧宰有課績官吏有否臧爰遣使臣申我休

命宜令度支及諸道鹽鐵轉運副使戶部侍郎兼御史大夫潘孟陽專往宣諭慰安疲昨詢訪便宜蠲除疾苦安人利國稱朕意焉

甄錄諸道節度使團練經略防禦等將士詔

諸道節度使團練經略防禦等將士久執干戈式遏封略勤勞王室深用嘉之據其優勞並與甄錄各委本軍本使即具名銜奏聞

遣使宣慰申光蔡等州詔

申光蔡及陳許兩道將卒百姓等比遭旱損多缺糧儲特

宜賑給令其有濟申光蔡等州宜賜米十萬石陳許等州
賜米五萬石仍令刑部員外郎薛舟充宣慰使專往存問

招諭劍南諸州詔

門下朕聞皇祖元元之誠曰兵者凶器也不得已而用之
恭惟聖謨常所祇服故雖文誥有所不至誠信有所未孚
姑務安人必能忍恥朕之此志亦可明徵近者德宗皇帝
舉柔遠之規授宰衡之傑宏我廟勝遂康巴庸故得南詔
入貢西戎寢患成績始著元臣喪亡劉闢乘此變故坐邀
符節朕以枉成命者雖乖於理體從權變者所冀於輯寧

竟違卿士之謀遂允僥求之志朕之於闢恩亦宏矣曾不知負牛羊之力飽則逾凶畜梟獍之心馴之益悖詎惑士伍圍逼梓州誘陷戎臣塞絕劔路師徒所至燒掠無遺干紀之辜擢髮難數朕爲人司牧育彼黎元如闢之罪非朕敢舍是用叶羣率之謀除百姓之害永清妖孽底定一方伐罪弔人於是乎在其逆賊劉闢在身官爵並宜削除今王師鼓行尋濟天險梓潼城守已解攻圍壓卵注螢坐看撲滅其西川將士如有乘此聲勢翻然改圖梟斬凶魁以效誠節者必當特加爵秩高位重賞朕無愛焉其餘將吏

等但能去逆效順以所領歸降者超三資授官以一身降者亦與改轉長行官健歸順者並與敘錄仍加賞給其西川管內刺史等當其阻亂孰克靜戈雖章表未通而衷誠可見今能歸款亦仍舊職如或乘機立效因事建功並特加酬賞務極優厚夫皇王之道弔伐所加義在除殘情非樂戰故脅從罔理必誠於徂征焚溺是哀俾興於後怨禁暴止亂其在茲乎況有跡陷凶徒心非黨惡歸我無路遂至淪胥言念斯流尤深軫惻所以明諭將帥罪止渠魁其餘染汙一切勿問布告遐邇咸懷朕意

處分及第舉人詔

構大厦者必總於羣材成大川者必資於百谷故思理之主求賢罔遺所以昭宣令圖廣大前緒觀文緝化其在茲乎朕以寡昧獲奉丕業虛己問政實始於茲考言求益敢不祗若故命左右輔弼洎有位之臣會於中臺必究其論閒密以獻省自朕躬果獲賢能副於饑渴才識兼茂明於體用科人第三次等元稹韋惇第四等獨孤郁白居易曹京伯韋慶復第四次等崔韶羅讓崔護元修薛存慶韋珣第五上等蕭俛李蟠沈傳師柴宿達於吏理可使從政科

第五上等陳祐等咸以待問之美觀光而來詢以三道之
要復於九變之選得失之監粲然可觀宜膺德茂之異式
叶言揚之舉其第三次等人委中書門下優與處分第四
等第四次等第五上等中書門下即與處分

平劉闢詔

朕聞去天下之害者受天下之利故陳諸原野非爲樂戰
法彼震曜本乎愛人五材不聞於去兵七德必先於禁暴
皇王之道豈不然歟逆賊劉闢時之妖孽處宵形之內罔
識君親同人代之閒別爲梟獍因元臣之蓄聚恃庸蜀之

江山誘誤生靈扇充桀逆朕荷祖宗之丕業執邦國之大
經人之亂常法所不捨乘茲衆憤爰戒徂征興戈矛於關
西發介馬於并郡五營禁旅七萃神兵合貔武之雄授鷹
揚之帥守無絕險進靡堅營麾城而壁壘皆空接刃而櫓
槍盡掃瓦解冰泮渙焉無餘微盧彭濮從茲底定蕩三蜀
之流患除一方之大殘豈予寡德能致於此斯皆宗社降
祐啟無疆之休將帥叶謀成永康之福祇若靈睭嘉乃衆
心予懷惕然若蹈冰谷其收復成都諸大將並擒獲劉闢
軍將等委崇文與都監軍使俱文珍條流等第聞奏即有

甄升其賞物等委崇文等節級分賜務令優厚投降將士亦委崇文文珍條流聞奏西川諸州鎮刺史大將及參伍官吏將健百姓等一應被彼脅從補署職掌一切不問西川百姓久陷兇逆不免傷殘其兩稅錢等委本道觀察使量事矜減其東川州縣及山南西道當兇徒焚劫之後王師攻取之辰發輓饋軍繕完補缺一日之費豈止千金三軍所資盡出百姓永言勞弊朕所軫懷其東川元和三年上供錢糧並放留州留使錢委觀察使量事矜減仍具數奏聞山南西道元和二年上供錢糧放一半官軍陣亡將

士等並委崇文監軍審勘具名銜事跡申奏即與褒贈家口等並委本軍優賞五年不停衣糧並委所在州縣速爲收葬仍量事致祭陷在賊中官吏百姓等應有節義著明無辜受戮者並委節度使具名迹奏聞當與追贈仍優給其家又分疆設都蓋資共理䟽域制壤亦在稍均將懲難以銷萌在立防而不紊故賈生之議以楚益梁宋氏之規割荆易郢酌於前事宜有變通其西川資簡陵榮昌瀘等六州宜割屬東川於戲制理經邦必垂意於未亂而養災蓄患固難禁於已然撲彼燎原至於用鉞永言迷復載軫

俱焚咨爾多士體予深志布告天下咸使聞知

誅劉闢等詔

劉闢生於世族敢蓄梟心驅劫蜀人拒扞王命肆其狂逆
誑誤一州俾我黎元肝腦塗地賊將崔綱等同惡相扇至
死不迴咸宜伏辜以正刑典劉闢男超郎豺狼醜類難議
生全務盡之刑同類九人並宜處斬

答杜佑表請致仕詔

卿量包久大器茂中和事君推一德之誠與物全四時之
信登於臺閣則萬事問於胡公守在方隅則四國宗於申

伯舉其實行是可專徽頃者殷憂在辰總錄攸重金甌作
鎮羣情穆然玉鉉是司庶官咸事朕涉理猶淺惟賢是圖
遽陳請老之章將輟弼予之道一一省覽良爲憮然用舍
之間慎重斯在謂雅志之難奪豈余衷之可移是用徵尚
德之前經酌優賢之故實去煩就簡免以職業之勤置几
乘車優其筋力之體卿宜起今已後每月之內常三兩度
入朝便至中書商量軍國事務亦冀延於內殿沃朕虛心
如此則居多暇長退可以吐納頤志入參大政進可以偃
息藩寮靈壽將置於上庠桑梓豈違於下杜卿仍以朕此

意宣示百寮庶乎君臣作合之期乾坤交泰之義無媿前列永貽後昆致仕之詞即宜斷表

授蘇繫等官詔

朕惟承累聖之業追先正之勞濟於艱難代有勲烈既而本根已遠枝葉稍零詔書屢勤於褒飾有司不忘於遴簡一命宰輔載宏搜揚錄其先功果復良嗣蘇繫等咸以茂學懿行勗於前修皆人之領袖族之狐趙類能而舉各命以官或任以糾繩或參於問列庶乎旌太傅之德將擬南城之封紹鄴侯之裔不俟東門之感忠義獲寵古今同之

贈袁高禮部尚書詔

王者旌表通乎異代況音徽未遠名迹可尋風流所傳弊俗興起舉其遺直足勸事君故朝議大夫守給事中襲南陽郡公袁高茂功之後清德冠時貞元初職在論駁常執讜議封還詔書居平蹈常則汎然而無忤會節有立皆卓爾而難踰故能望重朝端行滿天下未踰大任遽歿中身德之不忘久而彌著朕方宏景化寤寐前良用旌尚德之懷俾申加等之贈哀榮所被勸獎斯存可贈禮部尚書

討李錡詔

朕聞好生者天地之仁不在乎肅殺止戈者帝王之武不
尚乎誅鋤恭惟至言可謂明誠朕祇荷前訓續承丕圖每
思道以自宏豈佳兵而爲念雖朔陞阻命有戡亂之征蜀
部興妖獻夷兇之捷而所傷皆及於百姓所費寧止於千
金靜言思之往往興歎非不得已豈復用師李錡屬列宗
支任居方伯窮赫奕之貴飽綢繆之恩待以親賢報之以
逆節授以師旅用之以亂常肖圓首方足之形無五常百
行之性頃者累陳章疏勤請會朝姦態不形僞言甚懇朕
頗謂誠志久方允從乃降詔書俾修覲禮示以後命委其

深心而梟音驟呼虺毒橫厲初則詐疾後仍縱兵寮屬以獻規受屠使臣以傳命見脅朕務於含垢未忍明言累降中人令遵前旨無輶車之戒路有沴氣之滔天加以日暹淫刑冤痛者無告日興暴賦杼軸者皆空赤子咸罄於餽糧白刃屢膏於頸血朕爲人父母聞甚惻然罪人無狀却有常刑顧惟紀綱豈敢廢墜其討伐之師並已有處分剋期齊進其李錡在身官爵階勲等並宜削除仍令宗正寺削一房屬籍其兩都及諸州府應有李錡莊宅錢物等並委所繇官簿錄聞奏浙西將士素非同惡朕所深知迫於

兇威不能自達但王師進討因事立功梟斬渠魁以效誠
節必當特加爵秩超異等倫其將吏等以所領歸降者超
三資官以一身降者亦超資改轉官健歸順者厚加賞給
仍與敘錄明諭將士罪止一夫其餘染汙一切不問

禁厚葬詔

厚葬傷生明勅設禁但官司慢法久不申明愚下相循遂
至違越其違制賃葬車人六人各決四十

禁採銀坑戶令採銅助鑄詔

泉貨之法義在通流若錢有所壅貨當益賤故藏錢者得

乘人之急居貨者必損己之資趨利之徒豈知國計斯弊未革人將不堪今欲著錢令以出滯藏加鼓鑄以資流布使商旅知禁農桑獲安義切救時情非欲利若革之無漸恐人或相驚已日之孚在乎消息應天下商賈先蓄見錢者委所在長吏分明曉諭令收市貨物官中不得輒有程限逼迫商人任其貨易以求便利計周歲之後此法遍行朕當別立新規設蓄錢之禁所以先有告示許其方圓意在他時行法不貸朕志久定固無二言又天下有銀之山必有銅鑛銅者有資於鼓鑄銀者無益於生人適開翫好

之端豈救饑寒之患況欲加鑄理須併功得不權其重輕
使務專一其天下自五嶺以北見採銀坑並宜禁斷恐所
在坑戶不免失業各委本州府長吏勸課令其採銅助官
中鑄作仍委鹽鐵使即作法優賞條流聞奏於戲人之求
利厥路固殊斯道炳然言之不惑凡百有位明悉朕懷